

A volpe è u pastore

Quand'ellu fece quellu focu in Balagna ch'è brusgiò tutti i machjoni è ancu u restu, parecchi animali ùn a si franconu, è si truvò à mezu à i muzziconi abruscati levre, ricci, meruli è pernici arrustiti cum'è figatelli.

Una volpe ch'è s'era troppu alluntanata da a so tana riuscì à fughje ver di u mare, ma ci lasciò guasi tutti i so peli. Nant'à a coda poi allora, ùn ci ne fermò unu. È qualch'è ghjornu dopu, ch'è u focu era spentu è ch'è ùn fumicava più ch'è unepoche di ceppu d'alivu in quà è in là, a nostra volpe a si pigliava pian'pianu per u stradone, a coda stretta à mezu à l'anche di vergogna, ella ch'è prima n'era cusì fiera è ci tinia tantu.

Era, issa volpe, cusì sopr'à pinseru, ch'è ùn visse mancu un pastore ch'è andava à munghje è li ghjunghjia ghjustu in faccia. I pastori è e volpe ùn si tènenu tantu caru, è quessu custì, ch'è annu avia persu dui o trè agnellucci in una nuttata è ch'è avia u fucile carcu à l'armone, ebbe l'impiti di tiralli è di falla falà secca à meza strada. Ma, vidèndula cusì capipènciula è codipilata, ebbe pietà, è li fece ancu sta pruposta:

" O volpe ", li disse, " mi si pare ch'è ancu t'è ai avutu i danni c'è issu focu, è per issa volta ti vogliu aiutà. Veni ti ne c'è mè; ma femu i nostri patti : starai c'è Nigrone * ch'è u cunnosci digià è ne porti ancu e muche. T'amparerà à curà e pècure, ma attenta ! - T'è tocchi un agnellu o una pullezza, ti sciacca una cartucciata è ti lasciu infracà nant'à un ghjambu d'alivu ch'è, grazia à Dìu, si n'è francatu dui o trè ind'è a chjusella ".

" Hè detta ! " risponde a volpe ch'è ùn avia a scelta, " stupu in terra è a ghjurgu.

È cusì si visse qualch'è ghjornu dopu una volpe è un cane pasturescu scurrizà da un capu à l'altu di a banda di pecure, è addirizzà issi animali di pocu cerbellu ver di a calla d'un chjosu di pascera. ùn s'era mai vistu una volpe cusì, mammareccia per l'agnellucci.

È perciò, una notte ch'è ella durmìa à l'uscio di a m'ndria è ch'è ella sunniava forse à qualch'è pullinaghju di u vicinatu, si senti tucchichjulà à mez'à l'anche di daretu : era unu di ss'agnellucci, appena natu di a mane, ch'è avia persu a mamma è cercava à sughje.

A volpe apre un ochju s'è l'altu nò, è stà à sente inarechjita: nisun b'uscicu vicinu è Nigrone dorme quallà, bellu più luntanu, inzucatu come un ricciu infritulitu. Allora, ind'un ame, si intuppa l'agnellucciu è u si sciacca crudu crudu... È cusì f'è u vechju proverbiu ruminacatu: t'è, cum'è a volpe faci, perdi u pelu, ma u viziù mai !